



Pistill sveitarstjóra

Kæru íbúar og aðrir lesendur Áveitunnar.

Það er margt búið að gerast undanfarnar vikur og ýmislegt framundan með vorinu.

Fræðslu- og uppeldismál

Í mars var Gunnlaug Hartmannsdóttir **skólastjóri** Flóaskóla ráðin sem deildarstjóri Skóla- og velferðarþjónustu Árnesþings sem þjónustar Uppsveitir og Flóa í velferðarmálum og sérfræðiþjónustu í skólum á svæðinu. Þetta þýðir að auglýsa þarf eftir nýjum skólastjóra við Flóaskóla í vor. Von er á auglýsingu í blöðum og á vefmiðlum næstu daga. Gunnlaug starfar áfram út vorið í Flóaskóla.

Samningar um **skólaakstur** eru lausir í lok skólaársins 2022-2023 og liggur fyrir að skoða akstursleiðir og nýja samninga vegna skólaaksturs. Lögð er áhersla á að reyna að takmarka tíma barna í skólabíl eins og unnt er miðað við aðstæður.

Fræðslunefnd og skólastjórnendur Krakkaborgar vinna að uppbyggingu á nýrri **gjaldskrá** fyrir leikskólann Krakkaborg sem stefnt er að taki gildi eftir sumarlokun. Gjaldskráin verður kynnt vel fyrir foreldrum þegar að því kemur.

Umhverfis- og samgöngumál

Sveitarfélög gegna lykilhlutverki þegar kemur að því að mæta áskorunum á sviði loftslagsmála og ber sveitarfélögum að setja sér **loftslagsstefnu**. Sveitarfélagið vinnur um þessar mundir að undirbúningi gerð loftslagsstefnu undir handleiðslu SASS og í samstarfi við önnur sveitarfélög á Suðurlandi. Sveitarstjóri og fulltrúi úr umhverfis- og samgöngunefnd munu taka þátt í vinnunni við gerð stefnunnar.

Umræður um **samgöngur** í sveitarfélaginu bera oft á góma hjá íbúum en öll viljum við búa við góðar samgöngur. Gott samtal og samtarf er við Vegagerðina um hin ýmsu mál sem snúa að samgöngum og umferðaröryggi í sveitarfélaginu en mikilvægt er að halda áfram að reyna að sækja umbætur á vegum innan sveitarfélagsins. Í haust sendi sveitarstjóri erindi á Vegagerðina með ósk um að fá veginn á milli Oddgeirshóla og Langholtshverfis aftur skráðan inn á **vegaskrá** og gekk það í gegn núna í mars. Vegurinn er því kominn á vegaskrá að nýju og vonir eru bundnar við að Vegagerðin fari í lagfæringar á veginum sem fyrst. Þetta munar miklu varðandi akstur þjónustuaðila, íbúa og ekki síst vegna skólaaksturs en þetta getur munað töluverðu í tíma í skólabíl barna á þessum slóðum.

Girðingum með vegum er víða ábótavant og eru íbúar hvattir til að gera bót á því þar sem við á. Landeigendum ber að kanna árlega hvort þörf sé á viðhaldi girðingar og skal þá viðhald að jafnaði fara fram að vori samkvæmt reglugerð nr. 930/2012 með síðari breytingum. Viðhaldskostnaður girðinga með stofn- og tengivegum greiðist að jöfnu af Vegagerðinni og landeiganda. Mikilvægt er að landeigandi tilkynni árlegt viðhald girðingar til sveitarfélags og þjónustustöðvar Vegagerðarinnar á Selfossi og óski eftir kostnaðarhlutdeild veghaldara (Vegagerðarinnar). Stofnvegir í Flóahreppi eru Þjóðvegur 1 og Gaulverjabæjarvegur og tengivegir eru Hamarsvegur, Vorsabæjarvegur, Villingaholtsvegur, Önundarholtsvegur og Urriðafossvegur.

Nánari upplýsingar um þetta má finna í 2. gr. reglugerðar nr. 825/2017:

<https://www.reglugerd.is/reglugerdir/eftir-raduneytum/innanrikisraduneyti/nr/20706> og í

stofnreglugerð nr. 930/2012: <https://www.reglugerd.is/reglugerdir/eftir-raduneytum/srn/nr/18347>



Því miður hefur verið nokkur röskun á **sorphirðu** undanfarið. Ástæðurnar eru ýmsar og má þar nefna veður, veikindi starfsmanna og bilanir á bílum hjá sorphirðuaðila. Við vonum að sorphirðan fari að komast í betra jafnvægi með vorinu.

Grenndargámar við Félagslund fyrir málma og gler koma á næstu dögum og verður tilkynning sett á heimasíðu þegar þeir eru komnir. Minnum á grenndargámanna við Þingborg.

Því miður varð misskilningur varðandi **ílátastæðir** fyrir plast og pappír/pappa á milli sveitarfélagsins og sorphirðuaðila en við töldum að við gætum verið með stóra 660l græna tunnu fyrir plastið líka en því miður verður það að vera 360l tunna (nýja tunnan) eða minni fyrri plastið svo að hægt sé að hirða í einni ferð. Þetta snýst um tæmingarbúnað á tvískipta bílnum sem kemur og tæmir plast og pappír. Við biðjumst velvirðingar á þessu og vonum að það hafi ekki mikil áhrif. Við bendum á að ef plast eða pappirstunna fyllist við heimili þá er hægt að fara með það flokkað í Hrismýri og taka fram að það sé hreint plast og pappír og þá er ekki klippt í inneignarkortið.

Menningarmál

Mikil leiga er á **félagsheimilum** í vor tengt fermingum og einnig eru flestar helgar í sumar bókaðar í Þingborg og Félagslund. Eins og staðan er í dag eru tvær helgar lausar í Félagslund og ein í Þingborg á tímabilinu 1. júní-31. ágúst. Það verður að teljast jákvætt að fá nýtingu á félagsheimilin til að standa að einhverjum hluta undir þeim kostnaði sem fylgir því að eiga og reka hús.

Fulltrúar í íþróttá- æskulýðs- og menningarnefnd eru á fullu að undirbúa vorhátíðina okkar **Fjör í Flóa** sem haldin verður 1.-3. júní í ár. Við hvetjum íbúa til að fylgjast með facebook síðu Fjörs í Flóa.

Flóahreppur auglýsir eftir umsóknum um **menningarstyrk** Flóahrepps vegna ársins 2022 sbr. reglur um úthlutun styrkja til menningarmála. Sækja þarf um styrkinn fyrir 15. apríl. Nánar um styrkveitingu má sjá hér: <https://www.floahreppur.is/is/frettir/styrkur-til-menningarmala-umsoknarfrestur-til-15-april>

Íþróttá- og æskulýðsmál

Ungmennaráð Flóahrepps hefur haldið opin **ungmennahús** þrisvar sinnum í vetur og hafa þau verið vel sótt. Gott og öflugt ungmennaráðs er mikilvægt til að efla félagslíf og þátttöku ungmenna í fjölbreyttu starfi í sveitarfélaginu.

Félagmiðstöðin Zone í Flóahreppi fór með unglinga í 8.-10. bekk í skíðaferð í Skagafjörð í lok mars. Ferðin er samstarfsverkefni félagsmiðstöðvar og Flóaskóla.

Framkvæmdir

Sveitarfélagið vinnur nú að undirbúningi lagningu nýrrar **vatnslagnar** frá Neistatöðum að Skeiðavegamótum til að anna þeirri uppbyggingu sem framundan er á því svæði ásamt því að tryggja þeim sem fyrir eru nægilegt vatn. Fulltrúar framkvæmda- og veitunefndar og sveitarstjóri munu hafa samband við viðkomandi landeigendur á næstu dögum til að skoða möguleika á legu lagnarinnar. Að því loknu verður farið í hönnun, kostnaðaráætlun og útböð vegna framkvæmdarinnar og vonir eru bundnar við að geta hafist handa í vor eða sumar.

Ýmsar framkvæmdir eru framundan í vor og sumar í **fasteignum** sveitarfélagsins svo sem ýmiskonar viðhald, málun úti og inni, viðgerð á ljósum og hljóðkerfi í Þingborg. Umjónarmaður fasteigna vinnur þessa dagana að undirbúningi og öflun tilboða í hin ýmsu viðhaldsverkefni.

Vinnuhópur vegna skólalóðar og húsnæðis Flóaskóla hefur komið saman einu sinni og framundan er frekari vinna sem snýr að þarfagreiningu húsnæðis og aðstöðu á skólalóð. Anne Bruun Hansen hjá Eflu hefur verið fengin til að stýra vinnu hópsins sem mun skila af sér niðurstöðum eigi síðar en í október á þessu ári.



Verið er að undirbúa uppsetningu á hleðslustöðvum í sveitarfélaginu og kemur fjármagn í verkefnið að hluta með styrk frá Orkusjóði og að hluta úr sveitasjóði.

Vinnuskóli Flóahrepps sumarið 2023

Flóahreppur starfrækir **vinnuskóla** á sumrin í 7 vikur á tímabilinu frá byrjun júní og framyfir miðjan júlí. Vinnuskólinn er opinn fyrir unglinga sem eiga lögheimili í Flóahreppi. Verkefnin eru fjölbreytt og aðalstarfsstöðvarnar þrjár, við Þingborg, Þjósárver/Flóaskóla og Félagslund. Auk þess hafa eldri borgarar haft möguleika á að panta þjónustu vinnuskólans heim á bæi og svo verður áfram eftir því sem tími gefst.

Unglingar fæddir 2007-2009 eiga kost á vinnu í 6 vikur frá klukkan 9:00-15:00, mánudaga-fimmtudaga og þeir sem fæddir eru 2010 eiga kost á vinnu í 2 vikur í samráði við flokkstjóra.

Umsóknareyðublað vegna starfs við vinnuskólann má finna á heimasíðu Flóahrepps:

<https://www.floahreppur.is/is/thjonusta/fraedslumal/vinnuskoli-floahrepps> en einnig er hægt að nálgast útprentað eyðublað á skrifstofu Flóahrepps. Athugið að foreldri/forráðamaður þarf að fylla út umsóknina með barni sínu og hefur starfsmaður Flóahrepps samband við foreldri til að staðfesta starf við vinnuskólann. Útprentuðum umsóknum skal skila á netfangið floahreppur@floahreppur.is eða í afgreiðsluna á skrifstofu Flóahrepps fyrir 10. maí.

Flóahreppur auglýsir eftir flokkstjórum fyrir vinnuskóla og hvetjum við áhugasama að sækja um hér:

<https://www.floahreppur.is/is/frettir/flokkstjorar-i-vinnuskola-floahrepps-2023>

Viðtal við sveitarstjóra og oddvita:

Sveitarstjóri er almennt með viðveru á skrifstofu alla virka daga á opnunartíma skrifstofu og tekur á móti íbúum. Það getur verið gott að hringja á undan sér eða senda tölvupóst á hulda@floahreppur.is til að vera viss um að sveitarstjóri sé við og alltaf er hægt að bóka viðtal.

Oddviti er ekki með fasta viðveru á skrifstofu en íbúum er ávallt frjálst að heyra í honum, senda tölvupóst eða bóka viðtal við hann. Til að bóka viðtal við oddvita er best að senda tölvupóst á arni@floahreppur.is.

Húsvarsla í Þingborg og Félagslund:

Andri Þór Erlingsson leysir Ingibjörgu Einarsdóttur tímabundið af í starfi húsvarðar í Þingborg og sinnir húsvörslu í Félagslund. Bókanir og fyrirspurnir vegna félagsheimilanna berist til Andra í síma 866-7870 eða á netfangið andrierlingsson@gmail.com.

Opnunartími skrifstofu:

Minum á að opnunartími skrifstofu er frá 9:00-16:00 mánudaga-fimmtudaga og 9:00-13:00 á föstudögum. Síminn er opinn frá 9:00-13:00 alla virka daga og alltaf er hægt að senda tölvupóst á starfsmenn skrifstofu:

Anna Dóra ritari og gjaldkeri: anna@floahreppur.is

Hafdís bókari og launafulltrúi: hafdis@floahreppur.is

Hulda sveitarstjóri: hulda@floahreppur.is

Vaktsími vatnsveitu: 862-6848

Athugið að skrifstofa Flóahrepps verður lokuð föstudaginn 21. apríl vegna endurmenntunardags starfsfólks.

Næsti fundur sveitarstjórnar:

Næsti fundur sveitarstjórnar Flóahrepps verður þriðjudaginn 18. apríl kl. 9:00 Þingborg. Erindi sem óskað er eftir að verði tekin fyrir þurfa að berast á skrifstofu Flóahrepps eða á netfangið floahreppur@floahreppur.is í síðasta lagi kl. 12:00 föstudaginn 14. apríl.

Hulda Kristjánsdóttir, sveitarstjóri